

82.

Na osnovu člana 66. stav (2) i člana 68. stav (1) Zakona o organizaciji organa uprave Federacije Bosne i Hercegovine („Službene novine Federacije Bosne i Hercegovine“, broj:35/05) i člana 165. stav (3) Zakona o srednjem obrazovanju ("Službeni glasnik Unsko-sanskog kantona“, broj:17/12) ministar Ministarstva obrazovanja, nauke, kulture i sporta donosi

PRAVILNIK

**O RADU DOMA UČENIKA, UVJETIMA
ZA PRIJEM UČENIKA, NAČIN
FINANSIRANJA SMJEŠTAJA I
PREHRANE U UČENIČKIM
DOMOVIMA U SREDNJIM ŠKOLAMA
UNSKO-SANSKOG KANTONA**

I - OPĆE ODREDBE

Član 1.

(Odredbe Pravilnika)

Ovim Pravilnikom uređuje se rad doma učenika čiji je osnivač Skupština Unsko-sanskog kantona (u daljem tekstu: Dom), uvjeti za prijem učenika, način financiranja smještaja i prehrane.

Član 2.
(Dom učenika)

- (1) Dom je odgojno-obrazovna ustanova koja organizira odgojno-obrazovni rad, smještaj i prehranu, te druge aktivnosti učenika.
- (2) Rad i život učenika, odnosno korisnika Doma odvija se po utvrđenim pravilima ponašanja koja obvezuje sve učenike, ostale korisnike i radnike Doma kao i sve osobe za vrijeme njihovog boravka u Domu.
- (3) Odredbe ovog Pravilnika primjenjuju se na učenike i kada se dio odgojno-obrazovnog rada učenika izvodi izvan Doma (sportski turniri, izleti i sl.).
- (4) Učenik gubi status korisnika Doma u skladu sa odredbama zakona i Statuta Doma

Član 3. (Rad Doma)

- (1) Broj zaposlenih u Domu utvrđuje se na osnovu Pedagoških standarda i normativa za srednje obrazovanje, a u skladu sa odlukom o broju izvršilaca koju donosi ministar Ministarstva.
- (2) Organizacija rada Doma uređuje se Statutom Doma.

Član 4.

(Korištenje usluga Doma)

- (1) Uslugama odgojnih aktivnosti, smještaja prehrane učeničkog doma mogu se koristiti redovni učenici srednjih škola u Unsko-sanskom kantonu koji se školuju izvan mjesta stalnog boravka, koji su državljani Bosne i Hercegovine.
- (2) Usluge Doma mogu koristiti i učenici strani državljani uz saglasnost Ministarstva obrazovanja, nauke, kulture i sporta (u daljem tekstu: Ministarstvo).
- (3) Na nepopunjena mjesta Dom može primiti studente, polaznike seminara i tečajeva, ako to ne ometa redovni rad i život u Domu.

Član 5.

(Vrijeme smještaja)

Dom prima učenike na smještaj za vrijeme trajanja upisanog programa obrazovanja pod uvjetom da uspješno i redovno završavaju razrede, te poštuju pravila doma i odredbe o sklapanju ugovora, a o čemu odlučuje odgajateljsko vijeće Doma, nakon temeljne analize ponašanja i uspjeha svakog učenika.

Član 6.
(Obaveza sklapanja ugovora sa učenikom i korisnikom)

Sa svakim učenikom odnosno korisnikom programa i usluga Dom sklapa ugovor o međusobnim pravima i obavezama.

II - UVJETI ZA PRIJEM UČENIKA**Član 7.
(Prijem učenika)**

Prijem učenika vrši se putem direktnog prijema i na osnovu postignutog uspjeha u prethodnom obrazovanju.

**Član 8.
(Uvjeti direktnog prijema)**

Ako se za smještaj u Dom prijavi više učenika nego što ima raspoloživih mjesta, učenički dom obavlja odabir onih učenika koji ostvaraju uvjete direktnog prijema, a zatim obavlja odabir ostalih učenika prema broju bodova na osnovu postignutog uspjeha u posljednja dva razreda osnovnog obrazovanja i prema socijalnom statusu.

**Član 9.
(Pravo direktnog prijema)**

- (1) Pravo direktnog prijema ostvaruju:
 - a) učenici kojima su preminula oba roditelja,
 - b) učenici koji su upisali program obrazovanja u školi koja u sastavu ima Dom.
- (2) Status iz stava (1) ovog člana dokazuje se odgovarajućim dokumentima nadležnih tijela.

**Član 10.
(Broj bodova za prijem ostalih učenika)**

- (1) Broj bodova za prijem ostalih učenika ostvaruje se na slijedeći način:
 - a) učenik ostvaruje broj bodova u visini prosječne ocjene uspjeha u posljednja dva razreda osnovnog obrazovanja.
 - b) učenik čije je roditelj preminuo ostvaruje dodatnih 10 bodova.
 - c) učenik na osnovu Zakona o dopunskim pravima branilaca i njihovih porodica („Službeni glasnik Unsko-sanskog kantona“, broj:3/05, 1/09 i 29/12), Zakona o osnovama socijalne zaštite civilnih žrtava rata i zaštite porodice sa djecom („Službene novine Federacije Bosne i Hercegovine“, broj: 36/99, 54/04, 36/06 i 14/09) i Zakona

o socijalnoj zaštitivilnih žrtava rata i zaštite porodice sa djecom („Službeni glasnik Unsko-sanskog kantona“, broj:5/00 i 7/01), čiji prihodi ne prelaze 60% prosječnog ličnog dohotka u F BiH, ostvaruje 10 bodova.

d) učenik koji je u posljednja dva razreda osnovnog obrazovanja osvojio jedno od prava tri mjesta na kantonalnom takmičenju ostvaruje 5 bodova.

e) učenik koji je posljednja dva razreda osnovnog obrazovanja ima ocjenu primjerno iz vladanja ostvaruje dodatnih 5 bodova.

f) učenik sa posebnim socijalnim statusom ostvaruje 10 bodova ako živi sa jednim ili oba roditelja sa dugotrajnom teškom bolesti (dokaz liječnička potvrda).

g) učenici pripadnici socijalno marginaliziranih grupa 10 bodova.

- (2) Za ostvarivanje navedenih prava iz tačke (1) ovog člana učenik je dužan dokazati status odgovarajućim dokumentima nadležnih tijela.

**Član 11.
(Posebni uvjeti za prijem u Dom)**

- (1) Dom može utvrditi i dodatna mjerila za prijem i boravak za posebne programe obrazovanja i posebna zanimanja, te druge uvjete od posebnog interesa za Kanton.
- (2) Iznimno o posebnim uvjetima prijema u učenički dom pri rješavanju pojedinačnih slučajeva, koji nisu utvrđeni ovim Pravilnikom, odlučuje direktor škole/doma uz saglasnost Ministarstva.

**Član 12.
(Natječaj za prijem u Dom)**

- (1) Dom javno objavljuje natječaj za prijem učenika u kojem javno oglašava broj slobodnih mjesta i uvjete za prijem u školskoj godini i to istodobno kada se objavljuje natječaj za upis u prvi razred srednje škole.
- (2) Natječaj iz stava (1) ovog člana objavljuje se u dnevnim novinama većeg tiraža.
- (3) Dom dogovara sadržaj natječaja za prijem učenika sa Ministarstvom.
- (4) Natječaj sadrži upisne rokove, opis postupaka, način prijave kandidata i dr.

Član 13.
(postupak rangiranja kandidata/kinja)

- (1) Postupak rangiranja kandidata vrši komisija koju imenuje direktor (u daljem tekstu: Komisija).
- (2) Komisiju čine predsjednik i dva člana iz reda zaposlenih radnika doma.
- (3) Administrativne i stručne poslove za Komisiju obavlja sekretar doma.
- (4) Na osnovu bodovanja po dostavljenoj dokumentaciji Komisija je dužna sačiniti rang listu za prijem učenika u dom i istu objaviti na oglasnoj tabli doma.
- (5) Na rang listu iz stava (4) ovog člana kandidat može podnijeti prigovor Školskom/Upravnom odboru u roku od osam dana od dana njenog objavljivanja na oglasnoj tabli.
- (6) Školski/Upravni odbor je dužan da u roku od osam dana odluči o dostavljenom prigovoru, nakon čega donosi konačnu rang listu kandidata za smještaj u domu.
- (7) Rješenje o pravu na smještaj u dom donosi direktor/ica doma na osnovu konačne rang liste.

Član 14.
(Izvjestaj o upisu)

Pismeni izvještaj o prijemu učenika u Dom za svaku školsku godinu škola/dom dostavlja Ministarstvu i Pedagoškom zavodu do 30.10. tekuće godine.

III - NAČIN FINASIRANJA SMJEŠTAJA I PREHRANE UČENIKA

Član 15.
(Finansiranje Domova)

- (1) Financiranje Domova vrši se na osnovu Odluke Vlade Unsko-sanskog kantona za svaku školsku godinu, a u skladu sa planiranim sredstvima u Budžetu Unsko-sanskog kantona.
- (2) Odlukom iz stava (1) ovog člana utvrđuju se kriteriji, mjerila i načini financiranja rashoda učeničkih domova u okvirima utvrđenih sredstava po namjenama i to:

- a) materijalni rashodi,
- b) naknade za smještaj i prehranu,
- c) sufinansiranje naknada za smještaj i prehranu,
- d) rashodi za materijal, dijelove i usluge tekućeg i investicijskog održavanja.

Član 16.
(Sufinansiranje naknada za smještaj i prehranu)

- (1) Ukupnu cijenu smještaja i prehrane za učenike/ce srednjih škola u učeničkom domu utvrđuje Školski/Upravni odbor škole/ustanove u martu mjesecu za tekuću godinu uz suglasnost ministra/ice.
- (2) Finansiranje smještaja i prehrane učenika/ca snose roditelji ili skrbnici učenika/ca.
- (3) Smještaj i prehrana učenika/ca može biti sufinansiran iz vlastitih prihoda škole/ustanove koji se ostvare u realizaciji nastavnog plana i programa kao i sredstava Budžeta Unsko-sanskog kantona.
- (4) Razliku u ukupnoj cijeni smještaja i sufinansirajućeg dijela snose roditelji ili skrbnici učenika/ca.

IV - ZAVRŠNE ODREDBE

Ovaj Pravilnik stupa na snagu danom donošenja, a objavit će se u „Službenom glasniku Unsko-sanskog kantona“.

Danom stupanja na snagu ovog Pravilnika prestaje da važi Pravilnik o uvjetima za prijem učenika/ca, radu doma učenika/ca i finansiranje smještaja i prehrane, ("Službeni glasnik Unsko-sanskog kantona" broj 21/13.) od 25.12.2013 godine i Pravilnik o radu doma učenika, uvjetima za prijem učenika, način finansiranja smještaja i prehrane u učeničkim domovima u srednjim školama Unsko-sanskog kantona, broj 10-02-5534-6/17. od 14.06.2017. godine.

Broj: 10-02-157-1/2018
27.12.2017. godine
Bihać

MINISTAR
mr.sci. Muhamed Ramić